



Affons sil plaz-scola, lur via da scola ei liunga e buca carrabla cun autos. Biars affons han buca la pussevliadad dad ir a scola. Las casas ein destruidas entras il tiaratriembel da 2015. FOTO P. DUFF

## Tuatschins dattan agid al Nepal

■ (anr/f) Ina gruppada dad amigts da Tujetsch ei sefatschentada dapi enzacons onns da gidar il pievel da Nepal. Ellas vals periferas dil Himalaya ein aunc oz biars baghetgs, ch'ei stai destrui entras il tiaratriembel da 2015, buca baghegiai si. Ils Tuatschins construeschan casas da scola

per dar als affons la necessaria scolaziun primara en lur veta. Questa fin d'jamna orienteschan els sur da lur lavur e sur dils projects futurs da lur agid caritativ. Sonda proxima allas 19.30 el Center d'agricultura sursilvan a Mustér e dumengia proxima allas 16.00 ell'aula da scola a Sedrun.

## Cudisch davart la punt da Versell a Danis-Tavanasa

■ (cp) Sonda, ils 24 da fevrer 2017, 17.00, ha la presentaziun dil cudisch «Nossa Punt» liug en casa da scola a Danis. Autur da quella ovra bibliofila ei Wilfrid Dechau, in fotograf da renum internaziunal. Il cudisch cuntegn texts da pliras auturas e plirs auturs indigens, p. ex. da Peter Egloff, Robert Kruker, Arno Came-

nisch, Bruno Cathomas. «Nossa Punt» s'occupescha cun la punt da Versell, sia historia e renovaziun sco era cun habitontas e habitonts da Tavanasa. La presentaziun dil cudisch vegn accompignada musicalmeind da La Compagnia Rossini e finescha cun in aperitiv tier Samuele Gianoli en l'antieriura ustria Sur Punt a Tavanasa.

## Tavanasa: Tschorventà dal sulegl e chaschunà collisiun

■ (rtr) Tranter Trun e Tavanasa è in automobilist da 90 onns vegni mardi sin il vial oppost durant ch'el ha manipulà il parasulegl da l'auto. Là è in automobilist da 77 onns vegni encunter ad el, uschia ch'i ha

dà ina collisiun frontala. L'um da 77 onns saja vegni blessà mezzgrev, scriva la polizia chantunala. A l'um da 90 onns ha la polizia prendi davent il bigliet. Omadus autos èn vegnids donnegiads totalmain.



In dals autos demolids.

FOTO POLIZIA CHANTUNALA

## En Surselva per rallentar

■ (anr/sr) La sala en La Fermata a Falera ei s'emplenida il venderdis sera cun in publicum attent che ha pudiu rir da cor cun igl entertainer Bänz Friedli.

Siu program «Ke Witz! Bänz Friedli gudogna temps» ei divertents, spiritus, politics e para magari empau sco ina cuorsa encunter il temps. Igl ei strusch da crer con spert ch'in um oriunds da Berna sa discuorer. El raqueta buca mo ina sgnocca suenter l'autra, mobein tracta temas actuals e pren quels silla corna. Las pointas ein savens da rir, mo pon era dar da patertgar. Sco cabarettist sin tribuna selubescha el da pretender caussas e criticar persunas aschia sco biars auters ughegiassen probablamein sulet da far entuorn meisa rodonda. A Falera ha el capiu d'adattar il program al liug e ton directurs da pendicularas tochen tier il miedi Bürki – che ha da pinar quei ch'el rumpa cun ir cun aissa – ein vegni vidlunder. Era il dentist Grischnun che stat ella Bassa, Blocher, Trump ed igl uestg han survegniu enqual tecca. Tenor Friedli sa ins cumprar en empau dapertut, las bananas ein per regla d'anflar silla tasta 1 dalla stadera. El Volg da Laax fuvien ellas sin 237 e quei hagi el ina ga tematisau en ina columna. La proxima ga ch'el seigi vegnius en vacanzas a Laax erien las bananas silla tasta 1 e las vendidras tut loschas sin quei. El havessi denton preferiu sch'ei fussien restadas programadas silla tasta 237, quei mussavi che la Surselva seigi autra ch'il rest: «A mi scheva quei mintgamai, vus si cheu essas semplamein buca normals.» El program va ei atgnamein per gudignar temps ed en in tempo infernal raqueta Friedli co el spargnass temps sche buca tons stessen en via ad el e frenassen siu tempo. El ei digl avis che bia fuvi pli baul pli simpel e ch'ins perdevi buca ton temps cun apparats ed installaziuns modernas e hardumbels che duessen far tut pli simpel, mo cumplicheschien plitost la veta

e van cun temps. Ch'il cusseglier nazional Martin Candinas s'engascha per ina colligiatiun dad internet pli sperta per las regiuns agl ur plai buc al cabarettist:

«Na, grad per rallentar (far igl entschleunigen) vegnin nus gie si cheu en vacanzas, per far preschas dapertut savein nus star a casa.»



Bänz Friedli ha divertiu il publicum en La Fermata a Falera.

FOTO S. ROTHMUND

## Tschernobil Surselva: Anflau famiglias

■ (anr/abc) Tschernobil Surselva ei vidlunder d'organisar la proxima dimora per affons ord la Bielorussia. Dapi varga 20 onns porscha quell'unium mingamai il matg ina dimora da quater jamnas ad affons denter otg e 12 onns. Sco quei ch'ina dallas responsablas, Evelyn Carcaterra da Trin-Mulin, conferma ein daferton 13 famiglias che vulan dar all'oschi ad els s'annunziadas. L'emprema finamira seigi cun quei contonschida. Las biaras prendien dus affons, aschia che 23 affons ein daferton plazza. Quei che fa aunc empau fastedis ein las finanzas. Ei

seigi buc aschi simpel da planisar ils custos, oravontut pervia dils transports per rimnar minga gi da tuttas direcziuns e distanzas ils affons. Lur famiglias hospitontas ein spatitschadas naven dad Obersays, Summaprada tochen Sogn Benedetg e Lumbrein. Ei drovi in grond sforz organisatoric ed era finanziar per viadis, benzin e modesta indemnizaziun per treis assistentas ed accompignadras dalla Bielorussia. Sco quei che Carcaterra conferma impunda l'unium Tschernobil mintg'onn rodond 15 000 francs pil project da dimora a 20 tochen 30 affons. Sco quei ch'ella

confirma medemamein fa la dimora el Grischnun, ell'aria frestga e da cuminonza cun cameratas e camerats, effect veseivel. Ei seigi sco ina reconvalescenza, per in liung temps seigien ils affons che hagian passentau quell'as quater jamnas recreaziun el Grischnun pli fermes e sauns. Carcaterra ei engrazieivla per las donaziuns che l'unium ha retschiert en fuorma da vestgadura per la proxima dimora dil matg 2018.

Per donaziuns en fuorma d'in susteniment finanziar seigi l'unium Tschernobil Surselva vinnon engrazieivla. Ulteriuras informaziuns anff'ins ella homepage [www.th-surselva.ch](http://www.th-surselva.ch)

reclama



Sendeschluss? - NEIN!

«No Billag» bedroht nicht nur die SRG, sondern bedeutet das Ende der Regionalfernsehen und vieler Lokalradios in allen Regionen des Landes.

«No Billag» =



SRG



Regional-TV



60 Sender



13 500  
Arbeitsplätze

Deshalb am  
4. März 2018:  
NEIN zu  
«No Billag»

[www.sendeschluss-nein.ch](http://www.sendeschluss-nein.ch)

Mit Ihrem Nein unterstützen und erhalten Sie Ihr unabhängiges Regionalfernsehen und Regionalradio.

südostschweiz  
südostschweiz

TELESUISSE  
Verband der Schweizer Regionalfernsehen  
Association des Télévisions Régionales suisses  
Associazione delle televisioni regionali svizzere